

縣志卷第二十一

人物志四

宦蹟

明

張質聖型聖域

謝磷卿宗敏

劉存

劉顯孫熹

袁甯

伍佐驗陳瑪

羅愈

劉軒李承恩

楊如絲立庭午庭

鄒廷望泰

張大孝樵犬忠 陽思謙壽元律和

陽益祥龍

張鏞柯文軫

曾廷夏廷相周儒 柯廷瓚曾彭選

劉鳳倫鳳巖鳳侶鳳儔

張志夔奉正朔柯梅

奉佐朝柯桐 陽夢元柯日新 張隆曾崇易

鄒生鄒伍賢

伍鳳遷

劉壯行

國朝

金玉

鄒有熹

陳孟薦

楊坭

新化縣志卷第二十一

人物 宦蹟

杜要

周之璜

彭時捷振副

楊河

袁起鳳繪月玉

孫續潢

聶澄安惠士醇

羅拱興訓

周恭先榮幹維贊維襄

孫奇瑋

鄒杰

鄧長信

楊玠

楊瓊

曾承謙鄒洋

劉逢

鄒應昇應昌

曾功傑

楊世福聞義代壁

張如相

唐琳

游昌炳承細

楊繼觀尊齡

歐陽學

李嗣棠正之

彭泰枏緒瀛旭

歐陽時

魏崧

王家勳

晏貽玖

劉應祥

蔡錫申世燦澤瀛

唐鈞

張質性至孝祖必魁明初爲縣學廩生遭父母喪服闋詣郡縣具
啟單丁奉郵符赴都充厯事監生不知所終父謙九歲倚祖母李
力立門戶以父故終身哀痛質少誠篤有氣節見祖母苦節父戚
戚寡歡發憤攻苦以天順四年貢入太學官福建龍溪縣丞甚有
惠績子醇都昌縣丞從子濂雲陽知縣孫鏞平和知縣從孫錦廣
西縣丞曾孫志益四川縣丞家有治譜皆自質發之明季有聖型
聖域以文學氣節名於時者質之裔也見遺民舊志義俠傳有張
賢者卽張質之謫也
謝磷明永樂間人父秀早卒母楊氏遺腹生磷少負氣節家貧力
學永樂丁酉與同縣李政李宣吳昌奉儀五人同舉於鄉縣令某
爲建叢桂坊以榮之磷登宣德八年曹鼎榜進士厯官刑部郎中
歲慮死囚多所平反與上官侃侃爭辯不少徇未得大用而卒時
論惜之永樂庚子以第二人舉者卿宗敏官禮部主事亦才士事
蹟無所考云

新化縣志

卷第二十一

人物 宦蹟

二

劉存字以仁正統五年貢太學解褐得濟甯衛經歷秋滿遷福建
南安知縣致政歸以子顯貴推恩封戶部廣東清吏司主事存有
吏才初在濟甯戎幕處武夫悍卒之間又衛當兩京之衝祿奉甚
薄存勉強支柱事辦而人不敢以私干訖令南安存以閩地遠而
多瘴獨攜一力之任不以家累自隨見邱瓊所撰存妻張氏墓志
子二人顯昭

劉顯字明卿號獨山父存以歲貢官南安知縣顯登景泰五年孫
賢榜進士授戶部主事改吏部稽勳司主事轉戶部郎中出爲長
蘆都轉鹽運使鹽運人多視爲利藪顯性清介廉隅自勵謝事歸
宦橐蕭然舊時田宅未增一椽一畝初顯隨父南安署居三年成
進士歸舊宅盡燬於火無所棲止假寓僧寮先是正統流寇西南

徧擾楚黔接壤新化戍籍固隸五開衛軍徭雜處旦夕相望於道
尤易召亂顯所居近燕子巖又通逃藪也被害尤甚景泰初元之
亂村落一空其家有宋板書籍及大德閒譜牒皆燬無存顯匆匆
構草屋數椽居之後遭南安喪再起迄歸遂不易宅也晚節益自
好以謹厚謙畏終其身性好吟所居之地有獨山其陬名殿峯顯
爲作記以謂後枕熊山前襟資水欽崙厯落揖諸山而獨秀故名
獨山也嘗與其友月夜登絕巘大叫自謂不減阮嗣宗長嘯蘇門
之趣其風致如此有獨山草堂詩集詩見耆舊集學者稱獨山先
生歿祀鄉賢同時有孫憲者景泰五年歲貢官宿松知縣質樸安
靜賢能眾著宿人至今能言之

袁甯字邦固性聰穎十歲卽隸縣學正統丁卯舉於鄉初永樂中
命天下舉人入太學讀書以舉監又擇其英敏者命於諸司先習

新化縣志

卷第二十一

人物 宦蹟

三

吏事謂之厯事監生甯以厯事撥吏戶考最授貴州普安州知州
普安在貴州極邊蠻夷錯處地多營砦土酋強橫專擅殺戮叛服
不常有土官同知某狡悍尤劇視州官蔑如也甯至諭以利害酋
懷金啗之甯峻卻度難格乃陰搗其害民數十事白於上官酋覺
擁眾脅之甯從容卻退不數月酋誅死永革其襲普民德之甯持
已廉正御酋以誠信不貪其利不擾其族恆寓寬恤安撫之意於
政事中久之土酋營長無不讐服既考滿當選決計舍去母喪哀
毀甚有弟某以事繫郡獄甯微服往省守知延見甯固卻守爲加
禮縣令敦請鄉飲大賓以弟在繫固辭不赴時推爲古君子歿祀
鄉賢甯之卒也劉顯爲志其墓見藝文

伍佐字良臣別號文峯宏治二年舉人性沈毅有學識廉介不苟
居官力求民瘼慈祥豈弟不尙威嚴而民自畏初任河南府通判

遷安甯州知州安甯在滇西民多寄戶影射差徭佐編籍申白而
弊悉革以才再遷贛州同知贛俗強悍難治所屬龍南尤多盜時
剽掠為民患佐發卒掩捕直搗賊巢滅獲無數兩廣總督潘蕃上
其績時蕃方平海南賊巢千二百餘所又思恩田州兩岑氏相仇
殺蕃諭罷兵不從集兵十餘萬討之斬級四千七百盡平其地議
設流官以時方用兵邊郡需才乃奏擢佐知思南府思南為黔西
極邊民俗鄙悍野多虎患佐至率民攘剔叢莽縱火驅逐勸農桑
教紆織修學校置祭器定婚嫁喪葬之禮郡大治以日疾乞休思
南人攀轅泣留者相屬於道佐罷官至無以辦裝歸後閉門謝客
人罕見其面清操介節鄉之孺婦皆能言之子唵嘉靖二十二年
歲貢官樂平縣丞介直不苟人稱其有父清範佐梁志入理學有
文峯集及祀鄉賢詩見沅湘耆舊集與佐同舉者為陳瑀瑀同縣

新化縣志

卷第二十一

人物 宦蹟

四

人家貧力學才識明敏官臨川教諭當道重之嘗上平蠻二策康
熙梁志列儒林其後佐舉者有鄒學字倉山從其婦翁孫瑛官蜀
得專門禮經者師之遂以禮記孤經得宏治十七年鄉舉官沅江
府通判遷路南州知州性剛政敏夷情憚服附錄三塘伍氏譜載
佐傳云公年十三補
弟子員又十年始領宏治乙酉鄉薦又二十年謁選授河南郡僚
未授階而丁外艱服闋授雲南司李時正德七年壬申也任滿遷
江西之贛州贛固嚴疆其屬邑龍南多獠人出沒恃其險要所在
皆置砦民多患之其負刀持砦者以萬計公聞嚴自械備即編守
城兵二百人力拒相持二十餘日賊不解八月丁丑會黎明公奮
勇率健卒八十人抵賊巢一鼓而擒殲其渠魁餘悉放還田里而
龍南平會兵部奏其事陞貴州思南府在正德十三年也所經必
洞庭故事官病過湖例以羊酒酬神公故貧舟人以例白公不允
中流風波大作猶賦詩自若有目信平生守忠信今朝風浪定如
何之句夫人拔頭上釵擲波中少頃風定抵湖口有呼賣魚者舟
人剖之即夫人所沈釵也與王昌齡事相類及官思南益以廉隅
自勵幕友有啗以金者揮之不令再見但飲思南一杯水耳時民
以礦事繫獄者百十人累年不得直公抵任廉得其情曰吾不忍
民間賣兒鬻女輸官帑悉縱之歸官思南十載以勞勩卒於官歸
櫬之日思民相率而哭於道者皆繫獄之妻與子也至今贛州思
南兩處皆以名宦祀公父老有談當時德政者猶能淚下居官二

十年家無儋石儲性謙讓里居基址有與人毘連者人將爭之公知其故即遺書其子讓之人感其讓遂為閒地至今謂之知府巷者是也公安成舊族與宋人松溪名文定者同時文定與王新建齊名海內之士咸附焉公若不知其為宗人也者其生平之梗槩人抵如斯有文峯集學者稱為文峯先生按此傳出伍氏譜與舊志所載不同其尤甚者志載佐以病乞歸二十年始卒此云卒於思南異詞若此譜傳後出又無撰人名姓亦未可遽信姑附錄以存疑云

羅愈性廉介祖永高見孝友愈嘉靖乙酉舉人官廣東新會知縣操守嚴潔蒞事精敏新會故多豪族愈至抑強暴鋤姦宄積習一更去粵之日不以粵物自隨或窺其篋止橋實數枚備藥料也再補浙江湯溪縣擢成都府通判未抵任卒囊橐蕭然至無以歸櫬其妾張氏誓以死殉歸葬後雉經卒知府顏德倫詳請旌表與愈齊名者有劉軒

劉軒嘉靖丁酉舉人官四川榮縣知縣有惠政舊志稱其學醇行謹守潔才敏蓋當時考程之語也邦人重之縣治前有鴻漸坊太

新化縣志 卷第二十一 人物 宦蹟 五

守鄧繼會為軒立也繼會世廟時名臣以直諫下詔獄掠治謫金壇縣丞累遷至徽州知府卒其守寶慶在嘉靖十五年獨為軒立坊知必有見重於賢守者非僅以科名也邑嘉靖志專屬軒手紀事甚詳與軒同舉者有李承恩承恩同縣人官程番推官事蹟無考

楊如絲字資南嘉靖己酉舉人初任唐縣教諭遷邯鄲知縣擢山西遼州知州賦性敦大而精明練達長於摘伏所至以賢能稱年五十三卒官未竟所蘊識者惜之孫立庭午庭皆萬曆時貢仕有聲立庭字參字厯官四川岳池教諭廣東高州經歷午庭字昇字厯官武陵訓導興國州學正興國早苦無灌溉午庭教造龍骨車以興水利士民感之曰楊公車立廟祀焉立庭舊志稱其篤志古人獎進後學有詩名而不矜其才詩未見志作出泰州訓導調印

州學正轉高州教授與楊氏譜異

鄉廷望字子建一字見岳祖輝內行醇篤有讓產於庶弟事見孝友父楚錫封戶部主事世有隱德母會氏夢岳神捧星墜於懷覺而誕廷望故小字見岳登嘉靖四十一年申時行榜進士授新蔡知縣行取戶部主事摧稅臨清關出爲鳳翔府知府升甘肅衛行太僕寺少卿兼莊浪兵備僉事廷望有氣節清修矯然以古人自期許時望亦以是歸之宰新蔡多善政不名一錢其省濫派蠲浮征尤爲蔡人所感服爲立生祠其行取戶部推臨清稅也人皆以爲處脂膏地當得自潤廷望刻苦甚去臨之日誓不以一帕自隨守鳳翔值荒歲道殣相望廷望捐俸振飢民賴以活者甚眾又創立書院延名師教士子而大書忠孝節廉四字勒石以端趨嚮初洪武閒置行太僕寺於山西北平陝西甘肅遼東山西北平每寺

新化縣志

卷第二十一

人物 宦蹟

六

設少卿一人丞三人甘肅遼東每寺設少卿丞各一人擇致仕指揮千百戶爲之掌各邊衛所營堡之馬政以聽於兵部布按二司不得與永樂四年許令寺官按治所轄衛所鎮撫首領官更宏治三年簡推素有才望者補本寺官嘉靖三年復從御史陳誨請增設陝西甘肅二寺各少卿一員分管延綏甯夏已令寺官遇聖節輪年齎奏表文蓋其權漸重朝廷待之亦視各道僉事爲優矣於是廷望以才望推升是職有王判者沈寃獄久至是將行刑廷望細鞠之知其寃立予昭雪莊浪固原爲九邊重鎮舊有土城屢築屢圯廷望捐俸墜築城賴以固在莊浪四載甚著威績朝野屬望方期大用遽以養親乞退歸田之日惟圖書數篋敝衣兩笥而已寶慶知府滁州胡榎賢守也知其貧適郡有清出閒田舉以畀之辭不受親卒後遂不復出里居三十載閉門謝客遇邑中大利弊

始爲言於當事臨安姚九功東莞林培皆循吏也先後宰新化修
建學宮編纂縣志建各社義學平元溪宿賊廷望皆與有力培大
書其門云清得門如水貧惟帶有金其風節可想王進才寇掠邑
境過洋溪指廷望所居曰此鄒少卿宅也甚勿犯其爲賊魁所敬
服如此世傳廷望官太僕時進才實爲養馬卒云子泰萬曆十九
年舉人官四川知縣有聲蒙十三年舉人好學能文有有齋詩集
邵陽車大任序行今洋溪鄒氏有父子兄弟科第坊相傳亦培書
也廷望平時嘗言吾生平無所益於鄉里卽死慎無以其主祀鄉
賢臨終復屬其家曰我死後有以鄉賢請祀者吾不受也廷望卒
邑舉人羅可錦等臚其行實請於官其家以遺命固辭事遂不行
而新化自廷望後二百餘年亦遂無有請祀鄉賢者矣

張大孝字慕安一字蓼庵世爲巨族父楫鄉里稱長者大孝有夙

新化縣志

卷第二十一

人物 宦蹟

七

慧師事同里劉鳳倫宿儒也許以遠到大孝性卞急鳳倫規之遂
厚自貶損言行恂恂無少過鳳倫喜曰此真遠到器矣登萬曆十
七年焦竑榜進士授舒城知縣治聲大著權鎮江府同知行取戶
部主事轉刑部員外郎恤刑江西出爲順德府知府以憂去服闋
補鳳陽府知府遷四川按察司副使分巡馬湖道大孝仁明有吏
才居刑曹多所平反迴翔郡縣久所至推誠爲治慈祥豈弟頌聲
翕作世稱其善斷疑獄剖決如流好事者編爲歌謠名曰張公斷
布井小人競演唱村聚閒求食里娃村媪時有能誦之者家居禮
故舊周族黨尤好獎引後進至今人樂道之大孝從兄大忠崇禎
改元歲貢官江華訓導子世鼎陝西布政司理問孫璜圖雲南推
官以勤恪稱其家譜有云大威指揮大用分巡海興泉永道大順
通判者皆無考

陽思謙字生白祖壽元萬厯初以歲貢爲吳縣丞父律封戶部主事世有清望思謙幼負才名年十九登萬厯二十三年進士授四川銅梁縣知縣蒞事敏練清操矯然以與平播功行取戶部先是楊應龍之變上書自白遣其黨攜金入京行閒而執所部原告何恩詣綦江綦江舊屬播州洪武中固與銅梁同隸重慶者也嗣總督邢玠檄重慶知府王世琦詣綦江趣應龍聽勘應龍面縛道旁泣請願執罪人獻罰金世琦爲請於玠許之以聞於朝可其奏應龍獲寬益怙終不悛分遣土目置關據險厚撫諸苗苗人咸願出死力遂遍殘諸司各衛又侵湖廣四十八屯阻塞驛站索其仇殲之備極慘酷時萬厯二十五年也至二十七年起李化龍節制川湖貴州諸軍事調東征諸將劉綎麻貴等南征應龍乘大兵未集勅兵犯綦江陷之盡殺城中人投屍於江水爲之赤時化龍已駐

新化縣志

卷第二十一

人物

宦蹟

八

重慶徵兵大集遂以二十八年二月十二日誓師分八路進每路約三萬人官兵三之士兵七之旗鼓甲仗森列苗大驚總兵劉綎破其前鋒賊膽落遂連克諸關賊所倚天險謂飛鳥騰猿不能逾者兵至立破應龍益迫倉皇自焚計出師至滅賊百十有四日而播平當是時兵興旁午至蜀響動銅梁密爾綦江尤爲緊要思謙有應變才檄赴大營凡軍興以來徵調驛騷皆立辦事平敘功行取戶部主事厯本部員外郎中時中外行一條鞭法無他科擾民力不大絀而供億寔繁帝方贖貨開採之議大興歲以鉅萬計又以三殿工採楠杉諸木於湖廣四川貴州計費九百三十餘萬兩廣東珠池萬厯初停採既而以諸王皇子公主冊立分封婚禮令歲辦金珠寶石遣中官採珠至五千一百餘兩之多東宮出閣命下帝又令廣市珠玉珍寶供出閣儀計值三十餘萬而織染燒造

之寧江陵卒後添設亦多皆取貲戶部虛糜乾沒公私交困思謙
官戶曹久出入撙節籌畫儲備率致贏餘一時倚之出爲泉州知
府政績炳然泉人德之爲立主於四先生祠以配真文忠公以憂
去服闋由紹興知府遷山東按察副使整飭臨清風裁凜然未幾
致仕歸晚節益勵爲鄉里矜式思謙有清譽所至以威惠著其守
紹興所識拔尤多知名士思謙六世祖和官懷慶衛經歷按察副
使子文煒文燦文烝煒燦皆縣學生從子文燭文燦有才
名見文學

陽益性廉明有膽識正德初貢太學上書照免本貫加增稅糧邑
人德之出爲銅城丞與平宸濠之亂賜銀幣其後嘉靖中歲貢
有陽祥龍者官獲嘉英山知縣有善政英人祀之

張鏞嘉靖九年歲貢一作選貢官平和知縣平和置縣始於王守仁巡

新化縣志

卷第二十一

人物 官蹟

九

撫南贛時先是南中盜賊蜂起謝志山據橫水池仲容壩洲頭皆
稱王與大庾樂昌福建大帽山賊同起守仁檄福建廣東會兵次
第破一百二十餘砦俘斬一萬五千有奇乃設崇義縣於潢水控
諸窩而於下洲立平和縣置戍而歸平和設縣未久招徠撫輯甚
未易理加以民氣勁悍洲頭餘黨險阻負固時出沒縣境以擄掠
爲業民受其害鏞至因俗爲政一裁以法民情帖然乃一意平賊
縣大治終鏞之任盜不敢入平和境漳民德之時與鏞同貢者同
縣柯文軫官通海知縣亦有聲

會廷夏嘉靖十五年歲貢官儒林縣丞儒林故多逋賦廷夏至民
輸將恐後或問何以得此於民曰吾不負丞故民亦不負我無他
術也時謂其能以誠感人廷夏性和易與人無競家居尤能厚其
族人廷相者廷夏族人也以例貢官九江福州二衛經歷蘇州州

判以練達稱周儒亦邑人也以例貢官鬱林州吏目性慤直不屈甫數月即歸

柯廷瓚通海知縣文軫之子嘉靖二十年歲貢歷官獲嘉知縣師宗知州性質直有吏才師宗遠在滇西苗疆難治廷瓚御以廉靜

邊民悅服夷情帖然其繼廷瓚歲貢者有曾選彭鶚皆邑人選官長甯主簿舊志稱其才識過人振作有為任久不懈鶚官江陰縣丞舊志稱其才猷老練心地光明皆有聲

劉鳳倫字觀陽號潔齋與其兄鳳巖弟鳳梧以萬歷中先後相繼

貢太學鳳侶鳳儔均饒於學時稱劉氏五鳳鳳倫學有本原為時所推服以經藝授徒里中四川僉事張大孝其高足弟子也屢試

舉人不讐以歲貢訓導銜恩例授江西饒州教授改廣東潮州權

廣西來賓縣事卒於任見張大孝所撰行狀鳳梧見文學附張大

孝潔齋

新化縣志 卷第二十一

人物 宦蹟

行狀先生諱鳳倫字觀陽號潔齋梅山宿學也其伯叔昆季鳳巖鳳梧皆貢選鳳侶鳳儔均饒於學先生所從業者高岡先生鳳來首開巖序為學者倡以故家學淵源不就外傳博學能文蔚為賢達所推服隆慶戊寅先生館樂安離垢書舍大孝游其門竊擅慕其衣冠言動退且為文責沈明年先生方議昏官山劉義民之女配厥子咸謂胥安道識歐陽公之精鑒亦不過是顯延講白溪臨川社弟子日益眾每至牆舍不能容萬歷辛巳大孝補弟子員拜謁日先生喜甚謂再試春風人當呼我何難鄉會騰踏王午賓與生來同舟大孝乘閒好問先生明鏡不疲其分陸廚於筆牀茶爐間者十五六矣乙酉先生以疾不行大孝雖與賢書未嘗不以劉贊不第厚顏先生且曰今不及同上公車吾志休矣方歎其言之激徐曰吾二親年八十今而後恐無暇日矣戊子以外艱廢辛卯丁內艱丁酉庚子兩屆僅博一薦歲辛丑列貢士先生以訓導銜例授教授初任江西饒州復改廣東潮州嗣署廣西柳州來賓縣事二年所至士服其教民被其澤卓有時稱迨丙辰春而先生旋且捐館矣先生和氣溫德幾於瑞日祥雲咸以金玉君子稱孝性躁急以誠矜得減其半生平不言治家產升斗之俸周急黨里所置田園但供饋粥謂吾別有墨莊也性嗜酒嘗曰我不垂涎當路遇封酒泉都每讀書下之必欲數四不但以一斗驚杜和公耳告終館事先時問疾猶不廢酒謂丹田有稅本不可荒殆有獨得醉中趣者其魄多強記一過不忘故能兼舉史傳包羅百家而其為文端朴已見不隨人哭笑時好險怪則曰今日文人以皮毛怕人中未必有衣冠衣逐處其不見咋於虎者幸甚時好軟美則曰我輩為頭童齒豁阿婆轉效三五少年東塗西抹人不之憐羞而

見走其嶄然不移類如此邇年來睽違手札他人劍拔弩張先生直以淡遠清奇出之令人解頤迄今積成卷軸見落於股洪喬者畢搜得之無一不耐人尋玩者言及此抑又車過腹痛矣子四孫在澤隸縣學歧疑有祖風從遊門下蜚聲藝苑者凡十許人其具縑帛而狀先生者則高弟儀儒蓋簪兩秀士為領袖也以文寄大孝大孝曰先生之行非大孝莫狀也以大孝親炙日久行事獨詳於眾正猶歐陽棐在大常應例為堯夫作謚議不待其家上書下筆如自敘也故拭淚直疏不解藏善亦不敢虛美焉謹狀

張志夔字一卿父鏞平和知縣志夔萬曆改元恩貢初任四川內

江縣訓導遷郴州桂陽縣教諭剛果質直為時聞人志夔之先以

貢顯者有張炯張焯奉正朔奉佐朝陽夢元陽壽元柯文軫柯日

新柯梅柯桐諸人邑人所稱東奉西張南柯北陽者也炯南安教

授見儒宿焯新城縣丞附見於炯正朔佐朝俱嘉靖末貢正朔灌

縣主簿志稱其志行高潔急流勇退佐朝鄖陽訓導亦有聲夢元

隆慶初貢壽元萬曆初貢夢元新昌訓導志稱其文學博洽氣識

淵深而壽元則副使思謙祖也官吳縣丞以才守並稱文軫日新

新化縣志 卷第二十一 人物 宦蹟 十一

梅桐皆嘉隆間貢文軫通海知縣師宗知州廷瓚之父也廷瓚已

見前梅南康訓導桐廣信教授日新太平教授皆一門才也而日

新以理學著志稱其和易純粹年九十七卒別見遺民而其時舊

志所載諸貢有無事蹟可紀而系以一二言者亦彙而存之成化

時則有張隆定遠知縣宣德乙卯舉人丙辰副榜進士張洪之子

洪早卒未仕隆能繼起可謂才已嘉靖時則有曾崇易學業精純

鄒生漢陽教授性量闊達鄒賢武陵訓導安貧守約李文卿京山

訓導文卿見儒宿伍鳳遷太平教諭器度淵雅鳳遷鄉賢佐之孫

也彭湛祿豐知縣有政聲歸後與修縣志伍贊興國訓導博雅謹

愨舊志分注選舉名下為臚列於此以示不敢滅人善也

劉壯行天啟甲子舉人識趣高明疏財篤舊尤喜獎進後學身家

空乏泊如也晚官河南涉縣知縣有政聲粗衣糲食不改素志賦

歸蕭然行李唯做裘一襲殘書滿篋而已

金玉字輔石康熙五年舉人新化人 國朝舉於鄉自玉始也父
惟賢見善行玉有學識重名義癸丑試禮部後揀選知縣回籍候
選甫歸而滇逆變作湖以南郡縣相繼陷一時人士多脅從汚偽
命者玉故知名士偽檄敦促迫切玉以死拒既知不免乃易服遠
遁滇平後自以身經劫禍不欲習吏事慨然改就教職選蕪水教
諭蕪當鼎革兵燹後廟學荒頽僅存殿廡啟聖祠久廢射圃齋地
悉爲豪姓侵占玉一一清復修建事舉而民不擾蕪人頌之課士
嚴設經義治事兩齋分條造就蕪士成就甚多詩文超妙時以方
正希金公玉畱心民瘼加惠蕪民不少己巳荒旱嗷飢號寒者比
比玉商之當事徒步募穀千餘石振活數千人已而 朝廷遣使
者勘災復周旋籌畫其閒獲邀蠲免講讀之暇平爭訟倡任卹斷

新化縣志

卷第二十一

人物 宦蹟

三

童姻完配令還地瘞骸倡義振孤保嫠婦晚節凡有益於學校裨
於民生者必極其力之所能爲而後已見蕪人王保釐所作修學
記康熙三十六年陞常德府教授

鄒有熹字伯晦居縣南洋溪洋溪鄒氏有二族一爲路南同知鄒
學族一爲行太僕寺少卿鄒廷望族里人以其官別之有熹則同
知族也性質樸自奉儉約歷官霸州文安縣廣東開建 縣知縣布
衣蔬食未嘗以官自處子弟有來署者局之一室足跡不許踰戶
限官事畢則按日課之書聲琅琅然忘其爲官舍也其嗜學不倦
如此有熹以康熙二十三年舉湖廣甲子科鄉試

陳孟爲字季芳節愍公君寵之孫也康熙甲午貢生官巴陵訓導
在巴陵十二年大爲巴人所服舊志不詳其本末但云以例貢得
官士子悅服而已道光府志疑爲功貢之類列才傑傳今移置此

楊琨字玉似一字季友雍正己酉舉人登癸丑陳倓榜進士改庶吉士是科湖南入翰林者凡五人一爲祁陽陳大受一爲長沙羅源漢一爲湘潭劉元炳一爲湘潭張瑗其一則琨也時館選例需保舉而是時湖以南惟彭維新在朝琨足跡未及其門散館諸人皆留琨改禮部儀制司主事又忤禮部堂官降光祿寺署丞久之出爲施南府通判卒於官琨博學能文自以家世寒素發憤攻苦其舉於鄉也以五經獲雋壬子充四川鄉試同考官次年成進士入翰林益思爲體用明備之學不但以詞章名性靈直既改部鞅鞅不自得其由禮曹降光祿亦以耿介爲忌者所中暨通守閒曹益無所展布鬱悒以終未盡其才爲可惜也時與琨同舉於鄉者有楊振鐸杜要振鐸見儒病

杜要字朋若一字去貧居白溪市有兄三人要最幼生而倜儻不

新化縣志

卷第二十一

人物 宦蹟

三

羣稍長遭吳逆之變其父攜之走匿深山擔頭必繫書史兵戈擾攘中誦聲朗朗不稍輟也滇平後天下大定益自淬厲文名日起而屢困場屋僥得復失雍正己酉要年六十四與同縣楊琨楊振鐸同舉於鄉已而琨與振鐸相繼成進士登明通榜要年輩先於二楊恥居其後乾隆改元年七十矣徒步赴京與丙辰會試

高宗以登極恩命搜年老舉人硃墨卷進呈

欽賜國子

監學正蓋異數也要有至性刻苦自厲矜尙名義負氣不下朋輩多憚之初名替既屢試不售乃更名要字去貧其微尙也有觀瀾文集未見後要舉於鄉者爲王聖謨字顯哉希齋其別號也學者稱希齋先生晚官四川新甯知縣以母老乞歸新人爲建生祠書其善政於石至云在新十年其後囹圄空虛獄無一囚眞良吏也周之璜字次琮雍正六年拔貢 廷試入北雍以知縣試用江

南借補青浦縣丞嘗奉檄振徐州水災荒厓寒渚躬自勘驗無稍漏所至鹽場牙戶陋規革除殆盡以清惠著名卒於官時年未三十也囊橐蕭然至無以爲殮時論惜之

彭時捷字及三父振剛邑增生有學行以授徒爲業時捷生而穎異讀書至忘寢食弱冠文名藉甚舉乾隆元年丙辰 恩科湖

南鄉試屢困禮部試久之謁選得四川永川縣知縣時捷性樸訥粥粥若無能而聽斷明允每鞫一獄如家人父子相對不施鞭箠而人自服莫之敢欺永南有大寺僧徒多爲民害時捷廉得之會有告其橫暴者陰令其子往伺盡得其侵占姦利諸狀乃下招告之令訴者屬至時捷趣詣寺擒其爲首者餘悉勒令爲民籍其產所入以十之一量遠近給以資使各謀生業而改寺爲書院名曰錦雲延邑人王家駒主講家駒字子昂蜀之名進士也一時交風

新化縣志

卷第二十一

人物 宦績

四

不變時捷於是請廣永川學額爲上學永人爲建生祠子四人承漢承淑縣學生承豐承澎國子監生時捷有晚翠堂蒙王家駒序行也與捷同舉者九人時捷名次六其第二則陳錫周也別見文學

楊河字伏圖別號易峯曾祖應尊見遺民祖奉令見孝友父可震治經有聲見文學河幼承庭訓弱冠餼於學中乾隆戊午舉人壬戌明通進士選茶陵州學正時可震爲州訓導以例改調綏甯父子同官鄉人以爲榮丁綏甯艱服闋授空章教諭遷武昌知縣河通經術而有治才抵武昌八日卽擒治劇盜吳大在任革陋規除耗羨禁浮收江漢間呼之爲楊青天以母憂去官服除補山東范縣時 純廟南巡所治道在泗水之東最爲險巖河親駐督辦事集而民不擾又其時東省雨潦河以其閒犯泥濘徧勸振貸

無一夫失所在范久治最如武昌而勞更甚引疾歸五年卒河多
閭直諒性孝友矜尚名義詩古文詞皆不苟作與同縣毛學古交
篤學古外出其父大鶴卒於家河爲親視含斂經紀其喪曲至又
任學古宅待其歸始去其篤於友諒如此河有識鑑在武昌克鄉
試同考官得蕭芝爲解首卒成名士爲師志墓云子興植見文學
袁起鳳字颺南一字儀齋父玉字友昆康熙朝歲貢有學行選臨
武訓導不就舉鄉飲正賓起鳳以乾隆三年府學歲貢選授衡山
縣訓導高平袁氏藏書頗富起鳳幼學於父好古積學敦尚氣節
於人落落寡合而勇於赴義初至衡山卽捐貲修葺文廟來謁者
必教以敦行勵品衡人翕然樂從會歲大飢起鳳謀之邑令某率
衡人輸之設做施粥而最先出私財爲之倡是時衡陽湘潭長沙
三縣俱下令施粥一月以五月十五日始而衡山以五月二十二

新化縣志

卷第二十一

人物 宦蹟

五

日始已而三縣飢民就食來衡者以數十萬計衡令無以應未及
期三日撤做停振飢民大噪乘令歸署羣繞壞其輿令退至龍王
廟而飢民圍守不能散令微服徒步閒道返謀出營汛兵以解起
鳳曰是助之亂也乃單騎至龍王廟召飢民中曉事者譬喻之恍
以禍福眾稍稍解而急促令仍舊開做足一月之期眾始服未幾
乞歸衡士爲立去恩碑於明倫堂縣人曠敏本爲文以紀衡民亦
相與立長生祿位牌於南嶽行宮環道遮送三十餘里有泣下者
其感人如此子繪月乾隆二十五年歲貢亦有文行能世其家
孫續字嗣旃別號雪堂性端慤垂髫時不苟言笑比長補博士弟
子員刻苦力學同輩多畏憚凡七試舉人不讐乾隆丁卯以五經
中式本省鄉試舉人主試爲涇縣趙青藜名次第十第一則湘潭
羅典皆名宿也青藜嘗以誇於人屢院禮部試以需次得長沙教

諭每語人曰城南嶽麓朱張講學地我輩敢融其閒耶巡撫梁詩
正乾隆朝名臣也見輒舉手曰孫先生君子也其見重如此俸滿
遷臨邑知縣時山東有王倫之變臨清壽張諸境蹂躪幾遍王師
進勦軍書旁午齊魯諸縣惴惴懷疑懼有勸其少遼緩者續曰讀
書期於致用致身竭力此其時也朝廷安用此畏蕙之輩哉既視
事車馬稱餼挽輸絡繹事訖民不知兵地恆苦蝗爲謀求搜撲之
法甚至歲丁酉蝻生沮洳閒勢甚熾續竭誠禱於蜡神將往捕民
報有羣鴉集其處食蝻殆盡至誠感神如此治臨四年不以眷口
自隨蕭然丈室布被一鋪古帙數卷而已以母年老乞歸歸後六
年母卒服闋遂不復出子潢官貴州龍泉令續就養往卒於署先
是續語家人曰向夢龍臥井中而潢得龍泉吾命在辰其終於是
乎已而果然續居鄉以授徒爲業嘗躬畚鍤築一書室居生徒而

新化縣志

卷第二十一

人物 官蹟

六

使其妻職炊爨以飲食之其刻苦如此著有周易參疑管見左傳
類編諸書潢字裔天乾隆庚寅 恩科舉人時主試爲仁和孫士
毅桐城姚鼐皆知名於時喜得潢卷與長沙周有聲周大澗同稱
初官貴州龍泉知縣以父艱去起復補山西洪洞縣知縣有治聲
以用刑峻斃民命發往軍台効力在台久成易經簡括錄一書前
後穹廬二集子之柱縣學生

聶澄字靜川號藜軒祖安惠有還遺金事父士達縣增生見儒宿
澄少嗜學舉乾隆庚午湖南鄉試是科新化舉於鄉者六人李宗
泮蘇派鄒世治劉光地周榮幹其一卽澄也以五經次第九尤有
聲丙戌挑發山東以知縣用已山東人數多改撥直隸借補直隸
易州州同易州爲 神京左輔 陵寢宅焉 朝廷每屆舉
行謁陵大典差務繁劇澄承辦鉅工事無遺誤大吏廉其才檄署

所鄉武邑知縣所至有聲最後 題補西甯知縣西甯地界邊塞
時有蒙古牽涉之案歲嘗深入野地履勘親訊不辭勞瘁宜化守
有求於澄澄甫歸自窮塞歎曰邊牆萬里外苦塞沙磧之地令親
備嘗尙堪徵求乎遣僕以一騎獻則所乘疲騾也守衙之會澄開
倉征米杖其斗役之爲厲者三人三人者皆以病死守遂以連斃
三命參劾坐是獲咎安置浮梁澄亦不自辨居浮梁久與浮梁人
士論文講學資修脯以自給踰十八年卒澄喜吟兩次與修縣志
有詩二首見沅湘耆舊集子七人景辰景棠均縣學生景台拔貢
生景輝歲貢生尤有文名見儒宥有聶士醇者號龍川嘉慶庚申
恩科舉人道光丙戌挑選借補道州訓導在官三載州士多所
裨益乞歸著有篤村詩文草資陽雜著待梓

羅拱字穆宸父興訓歲貢生治經有聲拱幼承庭訓弱冠餽於學

新化縣志

卷第二十一

人物 宦蹟

七

中乾隆壬午舉人屢上春官鼎薦不第主講正誼書院縣人潘泰
曾承謙從遊習舉子業獲益甚多久之謁選得四川新津縣知縣
口訥無吏才而慈惠廉潔民戴如父母卒於官上憲憫其窮無所
歸醵金助之其爲上所推重如此子福圻歲貢生孫宥縣學生

周恭先字素芳父榮幹以副貢官龍陽教諭恭先生有異稟七歲
能文通五經史鑑大畧父榮幹負之應童子試知府王湘以子男
五十里屬對恭先隨口應曰府尹二千石其敏捷如此督學桐城
葉酉面試之詫爲神童附縣學籍時方九歲也踰二年癸酉應湖
南鄉試闈卷亟爲監臨范時綬所賞闈中已入彀矣以三場病未
與見遺時綬語其父曰是兒大成之器登科勿太早也又十年舉
乾隆庚辰 恩科鄉試丙戌成進士選授雲南建水縣知縣恭
先性廉介勤求民瘼治獄尤明慎而建水地產金官斯土者類多

負緣爲利會所治獄有宐問抵者案已定將出之矣恭先至閱獄
牘曰是不宐出吏挾前官畫藁力爭恭先持之急而其家果懷金
求緩恭先曰是迫我也緩之何以自明乃盡駁前讞按律問擬大
府以故入罪恭先發往烏魯木齊十年釋歸恭先喜吟詠胸次高
雅與同縣吳樵交最篤遭意外貶斥久處塞外出語和平無激烈
之音歸後布衣躬耕足跡不履城市日與田夫野老相酬答士子
有從之遊者亦不拒也有平山堂詩一卷學者稱平山先生詩多
選入沅湘耆舊集他所著述尙多其家不以示人遂莫得而見云

子維贊維襄亦有文譽附錄鄧顯鶴沅湘耆舊集小傳云恭先字

水知縣以事謫戍伊犁歸後布衣躬耕絕跡不入城市嘗暑月耘
於野偶憩柳陰下時值歲試有罷試事歸者就詢試題或易其爲
野老也擲揄之亦不較也先生性恬淡胸次高雅爲當道所重畢
尚書沅先生會試房師也總督湖廣時曾亟稱於某觀察延爲子
師會寶慶方郡試觀察因屬先生兩子於郡守先生聞之遂不令
其子赴試其冷峭如此幼奇慧九齡附縣學籍有神童之目宰建

新化縣志 卷第二十一 人物 宦蹟 末

水甫半載卽罷重譴非其罪也與同邑吳樵蘭柴以詩交最篤蘭
柴專主才氣以雄博勝先生斂才鍊氣醞釀深厚格律渾成雖遭
意外貶斥久處塞外而出語和平渾厚無激烈誰殺之音可以知所養矣

孫奇琇字佩璵一字梅臯與甯習及同縣鄒洪癸同舉於鄉三人
者皆有文名奇琇屢上公車俛得復失因畱都投徒有他克興阿
覺羅富春者相從受業一歲同舉京兆試京朝官爭延致之辛丑
大挑二等歷官常澧郴桂教職最後授武陵教諭所至務盡其職
俸滿謁選授廣西恭城知縣奇琇性慈惠恭城土瘠民愿專務德
化時乾隆末年有征勦楚苗之役兩粵接壤徵調旁午而平樂當
水陸衝大吏知奇琇才檄調襄理且徵民夫奇琇拊循有方民忘
行役既至未行而時方東作慨然曰因公病農非策也縱之歸曰
農事畢則率以來而身畱郡城以待左右亟沮之謂民散難復集
誤軍務且獲重譴奇琇笑弗納既而如期來無一人後者在恭城

十餘年以資升養利州知州在州五年民安其惠以老乞歸歸後
久之年八十三始卒奇琇有琴鶴圖一時名流題者殆遍而昆明
錢澧詩尤爲懇至其卒章云琴之爲言禁長勗無邪思鶴不浴而
白誰能涅以緇用此日律身精瑩無玷虧推此以及人風俗堪轉
移觀君之用意方今輩者誰其爲名人所推重如此奇琇三爲廣
西鄉試同考官得呂璜拔識之呂璜字禮北世稱其善古文云子
昌期貴州典史

鄒杰字萬子康熙甲子舉人文安知縣有烹其會祖也杰有文譽
弱冠舉乾隆戊子湖南鄉試初官桂陽教諭截取謁選得黟縣知
縣調繁昌再調宿松均以循吏著先是安徽教匪之案蔓延最廣
其著名頭目劉之協起自太和故搜捕尤亟一旦奉總督檄一村
被逮者七八十人杰知其枉乃親詣總督行臺省與七八十人者
新化縣志

卷第二十一

人物 宦蹟

九

具呈其狀總督意解被逮者俱得釋民爲建生祠杰爲政無赫赫
聲而所至崇學校革陋規擊豪強撫孤弱雪冤獄皆有名迹江北
稱能吏者不能遺杰卒官後虧項累累籍沒時其家僅敗屋兩楹
薄田數畝而已子繁歸唐氏女湘均能詩見文學

鄧長信字玉符一字璧園祖元臣見善行父勝遠縣增生儒宿也
以經學教授資湘閒學者稱松堂先生長信幼學於父性穎敏十
歲能覆誦十三經兼通大意十三歲工爲文隸縣學籍中式乾隆
辛卯湖南鄉試舉人辛丑大挑一等分發山東補鉅野縣知縣鉅
野多盜而健訟最難治長信至鋤強擊暴懲積猾決滯獄縣大治
性剛介不喜迎合大府雖善其所爲而銜之者眾鉅野歲濬運河
八十里重臣相視往來駐縣境又值東境大飢餓殍盈道長信設
法振濟不遺餘力而河工夫料一切出私錢雇買不以絲豪累民

坐是大困重以前令積虧攤款至三萬餘兩之多大府責令償補將中以危法會江南句容劫庫案詞連鉅野民姚大姚大者會以事繫縣為長信所責釋者也遂以縱盜論革職已復坐用官錢五十緡濬河漏報遣戍伊犁居伊犁八年歸歸後益貧乏資投徒以給布衣蔬食蕭然終其身長信博聞強記居官精敏明幹所至有聲與周恭先同歲生皆以幼慧早附學籍見稱於時其遣戍出關即恭先入關之年論者謂兩人皆賢均以耿介獲重遣不竟其用為可惜云有入關出關小草見沅湘齋集子鴻亦能詩

附錄顯鶴叔父鉅野

府君墓志銘云鄧氏於新化不顯明季始居下渡村之梓木衝自始遷祖至昭文林郎嚴隱府君凡五世單丁不振贈君之子文學府君始以其學授徒資湘間有名於時二子能世其業其一舉於鄉官縣令是為鉅野府君以忤上官獲罪仕復不顯府君幼慧七歲能文應文學府君館益陽人赫然稱之十二歲歸應童子試郡守覽羅德輿額公詫為神童言之學使者面試十三經皆背誦通曉大意詩文奇肆操筆立就大驚訝補博士弟子員年三十始中式乾隆三十六年湖南鄉試舉人又十年以大挑官山東知縣初

新化縣志卷第二十一

人物 宦蹟

三

試高唐州補曹州府鉅野縣多盜而好訟繁劇難治府君至懲積猾決滯獄鋤奸擊暴縣大治府君剛果在氣外嚴內明人不敢干以私大府亦憚其方直耿介而衡之者眾矣姚大者縣細民也以事繫縣待質歷城丞楊甲奉檄緝盜至縣欲交致其罪以為已功府君訊無左證釋之楊快去後姚以江南句容縣劫庫案牽連舉發大府以縱盜罪府君楊從與之因以洩前忿府君曰他邑盜吾邑民被人以媚盜罪府君不為也遂落職先是山東大饑餓殍盈道府君設法振濟不遺餘力鉅野歲例濬運河八十里重臣相視往來皆駐縣境民間差累不堪其擾府君一切蠲罷出私錢雇夫役坐是大困又前令積虧攤款至三萬有奇之多大府責令償補將中以危法府君則陰籍出入數為二冊將上之計無如何則授意代者毛索細故久乃撫拾姚氏官錢坐以贓姚氏官錢者姚丙兄弟以爭產訟府君案之斷五十緡充官濬河而主吏漏報竟以是坐遣戍伊犁居伊犁八年始釋歸歸後益困乏至無以為生課徒自給又二十年以嘉慶二十一年十一月日卒於家春秋七十有六某年某月日葬於太平祖塋之麓會祖諱林材祖諱元臣父諱勝遠祖及父皆贈如府君官祖妣李氏妣劉氏皆贈孺人配彭孺人後府君四年卒子二人鴻國子監生聘孫五人琦郡學生蓋府君歸自伊犁後且夕守課望其成也璉縣學生女一人適國子監生唐世偶拔貢生試廣東豐順知縣唐璉其外孫也府君諱長信字玉符一字璧園博學強記令鉅野時充乾隆癸卯山東鄉試同考官得闈學醇等九人多名宿致通顯居伊犁無書可讀日背誦幼時所讀經書無遺誤居官精敏明幹所至有聲初試高唐時巡撫國泰貪暴凌其屬不敢加無禮於府君阿桂文成公以

視河工過鉅野亟稱府君才可任卒獲重譴不竟其用不顯於時
嗚乎府君於顯鶴叔父也銘其叔父所能言者止此可痛也夫可
痛也夫銘曰學足以用世而不庇其身政足以易俗而不諫於人
其罷而謹也既無以理其枉其窮老而死也復無以救其貧豈賦
命之果厄胡所遇之皆屯嗚乎
廉吏而可爲也吾以待其子孫

楊玠字玉友先敦再從弟也祖如正父振笏見儒宿玠乾隆丁
酉舉人其弟瓊充是科拔貢鄉人以為榮玠官安徽泗州州同嘗
攝泗州知州屢充江南鄉試同考官為上游所重先是安化陶澍
為川東道時其弟瓊方官涪州澍謂其為父執且有吏才以鄉人
禮見嘗呼三丈而不名至是巡撫安徽玠以屬禮來謁澍曰君非
楊三丈之兄耶與劇談文藝不以吏事責也玠學行無愧其弟而
儉樸過之在泗久嘗率家人啖粗糲有所巡歷懷不托數枚飢則
啖之不責供給也歸後數年卒有姑經堂文集子源昌道光壬辰
歲貢見儒宿

新化縣志

卷第二十一

人物 宦蹟

三

楊瓊字象德一字叔玉別號芝林祖如正父振笏瓊幼慧與其兄
玠同有聲瓊年十四為督學盧文弨所賞識旋餼於學文弨固名
宿海內所稱召弓先生者也絕器重瓊攜之讀書勗以經世之學
已充丁酉拔貢生以 四庫館校錄勞議敘龍陽教諭乾隆六十
年辰州苗變檄調軍營積功擢四川納谿縣知縣調繁西充升簡
州知州調署涪州擢直隸西陽州未赴以疾歸瓊有治才練習吏
事精明果斷所至振刷擊豪強決疑獄治鹽梟蠹匪聞風而遁無
敢宿其境其在涪最久時總督為蔣攸銛川東道則安化陶澍也
皆以敏達聞一時澍初至川東條陳鹽務謂緝私不如減價攸銛
方下令捕私者許開礮專殺澍謂川省用兵之後私販雖橫有大
小兩股尙未公然執械抗官今一聞開礮之令勢必併小股為大
股激無械而有械亂未已也攸銛亟是其言如減價議檄下全蜀

遵行獨涪商不允名路私販全集於涪瓊佯弗聞先是瓊嘗陰籍
白役得精夫五十人朝夕訓練爲一流至是親詣澍所密請給兵
三百乘夜過發黎明抵涪時私販充斥以官無能爲也不爲備負
擔纍纍衢路爲塞瓊至出不意擒數十人販聞奔集廳事洶洶將
爲亂瓊坐堂皇出其首訊之羣不逞壘三棹爲臺以號眾有白衣
而草帽者登其上手葵扇揮斥瓊叱一役越而顛之立斃杖下乃
以次杖其首皆斃是日凡杖斃三人餘黨收繫無一脫者澍聞驚
曰今而後乃知楊三丈也蓋瓊於澍爲鄉先輩故以丈呼之而不
名也爲聞於總督嘉其能將與以超擢而瓊遽以病歸涪陵至今
尸祝之歸後築息園寢處其中頗得林泉之樂瓊喜吟不多作有
西充述事詩一首見沅湘耆舊集其首二語云化民其次莫如猛
好官不過多得錢嘗大書於廳事其風致如此子業治廩膳生源
新化縣志 卷第二十一 人物 宦蹟 三

濡例貢生均

贈奉政大夫孫曾入膠庠列成均登仕版者能世

其家云

曾承謙字利川號松園兄承姒早舉於鄉官甘肅知縣承謙幼樸

魯長始發憤力學沈潛經籍心思專一久之遂通百家言於六經

諸史旁及釋經道藏無不宣究舉乾隆己亥湖南鄉試 恩科

第一乙卯大挑分發直隸歷任定興甯津高邑知縣承謙口訥無

吏才而慈惠廉潔不名一錢所至民常愛戴定興地當衝要又其

時川楚陝豫同時用兵軍務旁午所調索倫勁旅及帶兵大臣皆

取道縣境承謙竭蹶供給伺應事辦而民不知有差累性好讀公

事暇則進邑諸生講說經義每坐堂皇左案牘而右經籍有時問

案畢兩造未退而書聲琅琅然吏抱案至則釋手所持卷從容復

訊曰以爲常最後在高邑以事去官歸後無以爲食醫所居宅償

夙負別蹠一荒圃搆茅屋數椽居之園授徒以爲食嘯歌自得
所著書甚多亦善爲詩喜弄章節義詩見沅湘者舊集承謙之友
有鄒錕者與承謙比鄰居中隔一牆兩人嘗隔牆酬唱甚相得也
以大挑同官直隸歷任肥鄉柏鄉武邑知縣在武邑最久嘉慶六
年直隸大水武衡諸邑都成澤國錕日懷不托數枚覓得民間一
楠柳盤代舫乘以行躬親勘視設法振濟廉從滑澁泥水中所至
荒村聚落男婦雜處叢柳閒面無人色見官至則泣錕亦泣或終
日不得食取民間惡草具充飢匝月始徧水退武邑民少飢餓死
者居武邑十年卒以禽治姦民斂費收禁爲所持總督以聞

嚴旨切責事白而錕已病矣卒於京寓人皆惜之子泮江西知
縣亦以交代去官錕字華袞乾隆丁酉舉人

劉逢字原旃所居有山名挂榜巖故以榜巖爲號乾隆庚子舉人

新化縣志

卷第二十一

人物 宦蹟

乙卯大挑一等以知縣分發陝西逢有幹略明習吏治初至陝值
川楚用兵大吏能之檄赴軍營事都辦旋署膚施膚施爲山北苦
寒之地土瘠民貧逢因俗爲治教民墾荒畚耕種積代粟縣當衝
軍書旁午民不知兵也以憂去膚施民送之多泣下服闋補白水
白水在南山之麓崇林密箐縣巨千里漢唐以來未經開闢所謂
老林也楚蜀餘匪竄匿其中時出爲患官兵搜捕往往爲所戕逢
團練鄉戶丁壯嚴緝復設計誘擒匪不敢近民賴以安逢慷慨尙
氣居白水十餘年不名一錢白水民愛之唯恐其去而性脫略滋
不悅於上官爲所中旣罷官白水人醵錢爲買南山荒地三十里
居之逢乃召其族人移家就居燒荒開種今遂爲白水人也逢一
子早妖惜不永年暮年置一妾生三女皆聰慧識字然山中無可
婚者逢卒後十餘年族子應祥以道光甲辰進士卽用陝西知縣

親至白水訪得乃迎致長安爲擇宦族嫁之逢有子婦陳氏雲南人早寡有節操能助其庶姑教三女成立見應祥泣訴其翁遺命當扶櫬歸新化求所親奉祀亦可紀也

鄒應昇字照輝祖嚴乾隆辛酉舉人父學楠廩膳生以投徒爲業見儒宿應昇幼學於父有文名性豪邁視離齷土渺如也乾隆己酉舉人嘉慶辛酉以大挑分發甘肅歷任西河通渭知縣應昇有治才所至與民休息嘗云吏治貴安靜先其弊之最大者強暴之著名者鋤而去之而輿情已安帖無用赫赫爲也在通渭見民間棺柩多奇寺廟纍纍相積乃出示遍諭有主者擇地安厝無惑風水無主者設法掩瘞毋使暴露文最淒切動人見者爲之墮淚已復出已財買地數十畝爲義冢不三月而荒郊叢櫓悉歸於土舊俗爲之一變其他多類此應昇官甘肅最久兩以憂歸至無以治新化縣志

卷第二十一

人物 宦蹟

一

裴服閔改就教職署湘鄉教諭未久卒弟應昌以拔貢官乾州教諭卒於官

曾功傑字文選別號亭雲乾隆甲寅恩科舉人嘉慶戊辰以知縣挑發直隸歷署南宮龍門縣知縣所至勤於聽斷有循惠聲先是直隸候補需次人眾功傑奉檄借補萬安縣丞怡然曰是豈不足爲政耶萬安駐劄張家口邊牆要地商賈雲集功傑循分供職潔已而無廢事極爲宣化守珠隆阿所重贈以楹帖聯語十四字云有猷爲守錫之福曰清慎勤加以寬其嘉許如此珠固一時所稱賢守者也功傑小心畏慎而遇事明決有定見尋題補甯津知縣甯津多積案民氣刁悍稱難治人皆視爲畏途有勸勿往者功傑笑曰我不往誰則當往至則爬梳決剔鋤強植弱不一月而宿弊俱清縣有張丙者里魁也武斷一邑人稱張四而不敢名功傑

因事嚴治置之理闔邑肅然性慈惠而最急人難民有積欠數百金全家繫獄不能償者爲捐俸代償之盧龍令宋某奉委修熱河大差蹕路所經橋垂成圯於水時隔期止七日自行臺省以下皆集宋倉皇無措大吏委功傑摘印功傑從容言曰橋圯出不意非宋令罪今以印畀功傑驟易生手益無能爲不如責成宋令而以功傑助之曉夜督工可不誤也大吏如其言橋成宋官如故其調補獻縣也布政使姚祖同方擢升安徽巡撫安徽有胡丙京控一案由部解回路經獻縣祖同以明察聞於時者也素才功傑屬爲代訊功傑備取供詞廉得其實不以隔省委卸卒依所詳定讞而案遂結其忠於所事而不自有如此功傑所莅多凋弊繁劇之缺辦理裕如民情愛戴爲上游倚重將予以超擢矣年甫六十卽以五品階乞歸歸後二十年年八十始卒說者謂其勇退知足尤

新化縣志

卷第二十一

人物 宦蹟

三

人所難及云

楊世福字祿田號壽霞父聞義樂善好施鄉閭推長者世福生而奇穎左目有重瞳子幼習舉子業以病中輟究心兵刑錢穀奏記章疏一切用世之學各省大僚爭相延致嘉慶初入貲爲河南布政司理問借補儀封廳經歷值流賊齊王氏高均德等作亂蹂躪楚陝擾及豫疆世福隨撫軍幕襄校戎務敘功陞授河南府通判

陞見

仁宗皇帝問楚陝賊匪情形世福具對防禦圍剿

事宜并不日可平定狀

仁宗以世福可大用著軍機處記

名某相言纔陞通判記名未免過優乃止世福有幹才通曉吏事所至有政聲通守河南時開濬洛嵩二縣新舊各渠功尤偉河南府土田高燥自漢唐來濬鑿各渠引伊洛二水灌溉農田水利以興有明宣德成化閒屢經修濬至宏治中開五洛渠而其利大普

久之涇塞洛民深以爲病世福履任歎曰官以水利名今曠官而坐視斯民之不利可乎會歲大旱布政使溫承惠按洛世福因郡民劉元舉魏闕棟之請以白承惠願修復渠道爲久遠計承惠嘉許授檄專行乃躬履勘形勢有稍近塋墓者捐俸買他地以代有渠道必經民田者使讓地倍償其值重鑿古洛大靖新興通津古洪舊渠五而大明黃道永濟清渠伊渠五舊渠則擴充之創開新渠大平樂豐天議人和香合會心周城金城永固甘鶴順興十有一自郡西北家村起口廣三丈身廣一丈五尺底廣一丈一尺兩堰各廣五尺深六尺至八九尺一丈有畸歷五十餘里至李家樓入洛開閘十六座又於渠口設總閘防暴漲築草堰資蓄洩每渠設支渠游渠壩堰橋閘備均水護渠之用其分水灌溉令民倣照古法議條約呈官泐石以杜爭端焦勞年餘成渠二十一道除大

新化縣志

卷第二十一

人物 宦蹟

美

明五渠舊灌田凡漆澗田二十一萬四千八百九十二畝渠民各於河神廟奉世福長生祿位巡撫馬慧裕閱兵至洛以其事入告奉 特旨褒嘉交部議敘調任陳州府通判勤求民瘼時易服密訪積年假銀偽票無賴惡棍淫博穿窬諸馮法剔首擱痊風尙丕變項城上蔡二縣界有楊泥河先是河淤水溢上蔡土豪常大化恃眾決堤下游田廬多被漂沒築堤者輒械鬪殞命官不能理大憲屬世福督築大化率眾械拒如初或請以兵往世福曰是將激變且多殲夷單騎往諭以禍福大化感泣聽命於是疏河築堤民皆安堵量減大化罪而流之晉同知尋丁內艱將行鄉民泣送者雲集請脫鞞誌遺愛起復發山東改撥河工已又改歸河南地方補用道光元年以同知署河南府通判巡撫姚祖同以河郡各渠道漸弛復委相視時已廢者十存者十一尙多梗塞世福草

積弊剖爭訟籌定枵費遴任渠長數月開聿還舊觀更新開洛陽
縣大和永慶水磨盤石四渠宜陽縣儘澆鈞濟二渠永甯縣畢澗
嵩縣大工各一渠重濬前工未竟之六合權善甘泉永利詳陳剔
除渠弊十條鑿木成帙印給各渠永遠遵照而渠弊以革慧裕承
惠皆有碑記河郡古洛五渠之民交製錦屏聯額以頌江陵胡兆
蘭大史爲文以謂古稱前有召父後有杜母者世福以一人兼之
矣是年七月任開封府同知時鞏縣煤窯圍禁工作之害烈且久
矣世福捷梃巨蠹峻拒私賂悉寘於法並詳請嚴示各出煤州縣
一體覺察全活民命無算二年知許州直隸州事許州民悍健訟
世福履任勤訊結嚴書役酌差科勘災卹患吏畏民懷闔郡獻心
守囚知匾額曰吾許從不諛官自康熙間一扁至公始再耳世福
議濬潁潁洗眉等河循唐宋河渠故蹟濼洩水旱溉田旋以病去

新化縣志

卷第二十一

人物 宦蹟

三

任未果世福工書法兼篆隸四方求者趾錯戶宦河南久巡撫顏
檢嘆爲豪傑溫承惠稱爲循吏良吏姚祖同謂其人甚正氣畱心
民事辦公認真匪過也年七十有二卒有開濬河渠本末編見藝
文志子代瑤河工分縣代壁署江南安東知縣有廉能稱代部幼
隨父候補山東同知時寓濟甯與河南考城楊兆新篤宗盟相友
善借籍試入縣學第一旋冠歲試曹食餼世福改官河南遂不再
應河南試納貲爲國子監生南北鄉聞屢薦不舉加州同知銜代
部字亦斌號善堂植品績學遠近稱之

張如相字德卿郡學生敦崖長子也幼負奇氣慷慨有大志爲文
風發泉湧不可端倪嘉慶辛酉舉於鄉連捷進士籤發貴州知縣
初任天柱俗靡民黠如相隆禮紳耆詢民間疾苦及興廢所宜革
跳歌換帶淫風禁出入攜刀惡習頭門外懸大鑼一面有負屈不

仲者聞鐸鳴卽升堂皇鞠訊隨時剖決一時囹圄爲空莅任甫
三月邑大荒民饑設法振卹復請濟於上憲不允如相力陳瘡痍
狀稟至四上乃行全活無算尋奉委採辦滇銅歷四載差始竣授
婺川縣知縣旋署清江同知清江地廣七百里一百七十砦苗民
頑犷罔識詩書如相至立教臺讀法諄諄勸誨并廣設苗砦卹塾
興復柳川書院而申謹其教作勸民歌百首譯以俗言俾椎魯者
皆能持誦用是僻陋荒服文教一新又建普濟院便民倉爲老弱
廢疾旱潦凶荒之備凡案關民命審聽至再三以期得情或重加
箠楚退必哀矜嘗曰若輩自知罪坐不宥假以寬恤或譎張滋甚
嚴刑峻法又慮屈抑成獄尙恃才臆斷實造兒孫無窮之孽也歷
官數任理執其是雖上官有所屬託不稍貶抑以枉法而虐民以
此輒相牴牾改就教職署長沙府教授逾年授湖北漢陽府教授

新化縣志

卷第二十一

人物 宦蹟

天

加國子監博士銜卒於官宦橐蕭然所著有四字童訓包羅人物
囊括古今紀文達昉鑒定梓行又有古今體詩十餘卷天文地輿
銅人全圖若干卷待梓子擢沅孫鐸均有聲庠序

唐琳字岱生祖大章父世倜皆國子監生世倜見文學琳母鄧氏
鉅野令長信女也禱於岱廟而產琳故字曰岱生四歲歸里聰慧
異常兒比長通諸經熟於孔鄭家言善屬文尤工楷書二十三歲
附郡學籍旋餼四十人中爲廩膳生學使李宗瀚徐松絕器之試
皆第一嘉慶癸酉充拔貢生尤爲學使湯金釗所賞重 朝考報
罷充鑲黃旗官學教習報滿以知縣用分發廣東試用旋丁外艱
服闋試豐順縣未幾以利下卒官琳性謹飭而居官廉慎極力振
刷豐順隸潮州民俗鄙悍習械鬪官不能治琳擒治百餘人俗積
革有大姓以爭隄構釁琳單騎往平之兩造悅服釀金爲壽琳卻

之大姓相與建生祠於隄上名曰唐公祠其得民如此惜未竟其

用而卒其從舅鄧顯鶴為志其墓附錄鄧顯鶴所撰唐君墓銘君

城內曾祖文爵以財雄於鄉好施與祖大章兄弟六人析其產又

不善治生家遂落父世獨國子監生有清譽母鄧氏余叔父鉅野

君子也鉅野君在官時贊監生君於署以乾隆五十年十二月除

年甫十三絕愛之時就幼聰慧眉目秀整四歲姊攜之歸余

長身尤善楷書監生君博雅好學長於治經家言善屬文喜為六朝

小賦尤善楷書監生君博雅好學長於治經家言善屬文喜為六朝

之日也生海岱間殆非翁比姊笑曰兒生時余固禱岱廟也余因字

人曰岱生二十三歲附寶慶府學籍為府學生二十歲充縣監

中為廩膳生試皆第一二八歲充拔貢生三十二歲充縣監

生君自幼愛之倍常兒雖壯恆視如嬰稚自縣府鄉試及貢太學

必借跬步不離最後分發廣東年四矣猶揭之行君至粵檄勘

海道奉無醫藥遂卒於舟次君大痛棺斂之具咄嗟立辦哀毀背窮海

倉卒無醫藥遂卒於舟次君大痛棺斂之具咄嗟立辦哀毀背窮海

幾致不起既歸葬於舟次君大痛棺斂之具咄嗟立辦哀毀背窮海

復曩時風貌矣又貧困不能治裝余資之行至則試豐順縣豐順

更潮州民俗鄙悍習械鬪官不能治裝余資之行至則試豐順縣豐順

卒時道光十一年八月日也春秋四十有八君學無常師諸經授

新化縣志

卷第二十一

元

之監生君詩文余間一講授故君於諸舅中獨師事余性謹飭循
循如處子而激於義勇恆一發莫遏試豐順日擒治械鬪案多至
百餘人大吏不欲竟以是鬱鬱不自得又備累鉅自以內外親依
倚眾祿薄無由給母老病不能迎養而左右近習無一能諒其隱
者常咄咄自語中年後得目疾既病能鑿下作小楷醫者曰此精
氣外鍊於法不治竟不起嗚乎鄧氏之衰久矣乃至所出者而亦
摧折之唯恐不速可痛也夫可痛也夫君終喪過我諄諄以其父
墓志為請未及為而君訃至君卒後其弟琛亦客死萬安吾姊窮
老目盲一門孤接無儋石之儲而余又貧窶無餘貲他及其卒能
歸君窆於窮海萬里外者吾友桐城姚鴻遵豐順令蕭山許炳力
也君娶姑女袁氏子二人銘鈞女一人適同縣北渡楊氏以年月
日葬於監生君兆側而舅氏鄧顯鶴追志其墓而銘之銘曰衰宗
不振望所出子於我出才日傑謂成宅相光闕闕豈意一官不自
得海濱萬里羣蠱痛命未即慎身已歿歸葬先兆儻友德我銘其
幽淚橫溢岸谷
深陵保此宅

游昌炳原名昌灼字俊吾父承緗字振琮工詞翰寶志早歿昌炳

嘉慶戊辰 恩科舉人丁丑大挑一等發山東初至派赴讞局甫

二年訊結咨奏案二百餘起委署陵縣事緝獲直隸東光縣謀毒

祖父母重犯山東巡撫琦某直隸總督蔣某交章保奏

詔送

部引 見以同知用歷任萊蕪范觀城商河鄒城等縣審聽廉平
期兩造帖服狡詐者繩以法貧懦者撫以恩每詣鄉村必細詢民
聞生計收穫盈歉賦稅於正供外無苟取或值銀價昂有止完緡
錢不敷兌解者則墊賠不以累民善捕盜故事禽獲賊犯者歲終
彙報百名以上紀錄一次二百名以上紀錄二次昌炳前後遞加
至三十六次尋以獲盜功兼理沂鄒海豐通判補授登州府同知
權知府事道光二十年以事去官所著有帝王世紀纂要周侍郎
石芳鑒定刊行又有雪晴山房時藝一卷古今詩體一卷待梓卒
年九十有三

楊繼觀字利賓號蘭皋父遜見文學繼觀由廩生登嘉慶戊辰
恩科鄉榜九試禮部七薦不第考授宗學右翼漢教習期滿發山
西權知絳縣事廉明端直平差徭除陋規甫三月卸篆絳民挽留
留

新化縣志

卷第二十一

人物 官蹟

三

單騎晉省大吏委辦讞局事平反積案剖決無留滯民情悅服尋
丁外艱有候質老嫗號咷而出以不得一言爲憾回籍旋丁
卒於家初繼觀北上舟過臨湘省父遜訓導署父手錄呂叔簡省
刑箴授之故在官未嘗虐民酷吏季子尊懿以孝聞母汪氏項病
疽懿吮之稍愈後病劇嘗糞辨證隨割股進母竟不起懿哀痛以
毀終

歐陽學字大元號一齋以縣府試兩冠軍隸學籍嘉慶戊辰 恩
科中第四名舉人屢躋春闈徧游秦隴聞道光丙戌大挑一等發
直隸時何文安凌漢爲順天府尹委辦紅冒案紅冒者匪黨號也
勾引無慮千人學廉得渠魁按治之餘從宥反側以安府尹稱其
能歷署懷柔寶坻永清大興等縣知縣所至有聲道光十年丁內
艱起復補保定府望都縣知縣矢慎矢清以鄰縣解犯過境遁竟

呈吏議適有父喪縣民醵金賻送謝不受服闋改就教職歷永明
衡陽教諭並江訓導咸豐六年授溆浦學教諭以老引退時年八
十有二猶能作蠅頭細字主講資江書院多士景從同治丁卯鄉
試屆重赴鹿鳴以是年卒八十有六

李嗣棠字蔭南縣廩生正之之子也正之端介士訓子嚴動靜起
居少不率卽怒責嗣棠謹守繩尺發憤攻苦無暇日弱冠補弟子
員正之始以是歲優等食餼督學張某笑謂正之曰生得佳兒異
日策其驥足將駸駸出驛驢前矣一時傳爲佳話嘉慶庚午以廩
生舉於鄉道光丙戌成進士 欽點翰林院庶吉士散館改授廣
東恩平知縣恩平濱海土田時因海潮荒廢坐是額徵多逋負棠
履任曉以大義化以詩書鋤強魃扶善良恩民愛戴雖積年逋欠
悉輸完其地差役素強橫多設私卡勒索知立毀之置蠹
新化縣志

卷第二十一

人物 宦蹟

三

役重典並與紳民斟酌善後條款泐石垂遠恩平縣試近二千人
屆期官自捐廉於大堂倉廩隙地設棚試士風雨飄零多士苦之
嗣棠倡捐創建考棚兼下惜字令備貲購收公餘與士子論文如
師弟然充廣東辛卯鄉試同考官榜首及次俱出其門時稱得士
解組歸足不履城市優游林下以終

彭泰柟字桂舫父昌際見儒宿泰柟幼穎敏隨父讀攻苦刻勵淹
通經史弱冠隸郡學廩生登嘉慶戊寅 恩科鄉榜道光丙戌大
挑一等發貴州初署長砦同知有治聲繼署麻哈州知州置義田
攤浮糧決疑獄州人謂二百年來魏公而外無此治也乙未授清
平知縣兼權麻哈事主修邑乘立節孝祠皆曠典平反枉法出吳
某主僕於獄手縮雙印措理裕如秩滿大計卓異陞黃平州知州
黃平素稱難治泰柟視事未久詳銷積年畱滯上控案三十餘起

創建考棚增置學田廣籌卷貲文教爲之一振先是黔屬屯堡密
邇苗砦屯軍恃無緝捕責每勾串苗匪肆劫潛代銷贓秦柎深悉
其弊作推廣由疆緝捕事宜貴州巡撫賀長齡據以入奏議準
施行著爲例迨歲兩產嘉禾大吏以政成民和上滋瑞應重之
察使某札委運鉛秦柎晉省乞養不許適麻哈有越獄案四人三
係黃平砦苗麻哈知州某以劫獄報會營往捕苗眾抗禦大府以
秦柎爲苗民愛戴檄回原任勦捕並諭獲犯免差運秦柎單騎抵
砦傳集苗民曉以利害促令自首許爲昭雪住砦僅八日全獲解
省竟置之法然苗民亦無怨秦柎者已臬使復委運鉛差竣回黔
又委解京控官犯赴滇會黃平抗糧控經督撫時鄭某署黃平事
奉札提案諸糧戶圍之於黃平舊城累日知府某聞變稟請速飭
秦柎回任比至諸父老夾道焚香跪迎羣相慶曰使君來糧案結

新化縣志

卷第二十一

人物 宦蹟

三

矣接篆甫三日丁內艱黔省秋糧通係九月朔開征州民以案未
結延不納鄭某又無力墊辦藩札催征鎮札催解羽檄交迫日喚
柎何秦柎弗忍坐視招近城紳耆至寓敦勸未浹旬全案人集諭
令糧米照前徵收不得溢額折價銀兩照前並減平色眾帖服事
平促裝回籍士民泣送不忍釋咸豐改元服闋引見選授黔西
州知州未幾以衰老致仕秦柎宦黔二十餘年歷充道光壬辰甲
午乙未丁酉己亥癸卯鄉試同考官所得士多通顯居官廉儉俸
餘所置產均分兄弟行待寡庶嫂弟婦尤厚歸田後著述自娛有
還讀堂詩文集邑中團練捐輸積穀諸義舉多資其力主講資江
書院從游甚眾每課手一藝爲程一夕夢故同寅周某操簡來云
貴州城隍任候君久矣當速往醒告家人曰恐妖夢是踐將朝不
及夕也越數日竟卒時年八十子緒瀛縣學生入貲爲吏目發廣

西署全州吏目卒於官緒薰國子監生緒熙縣學附生有彭旭者字暄塢道光丙午以宛平籍中順天鄉試咸豐五年軍功保敘知縣發河南歷署淮甯項城商城固始新野等縣知縣同治八年授南召知縣莅任甫三月調署蘭儀九年以河南守城功由直隸州保升知府七月委署濬縣未履任卒於蘭儀旭有幹畧勤聽斷宰河南十餘載所至有聲其在蘭儀也瑞穀五歧署生芝草人以爲休徵云著有珂溪詩鈔涇縣趙書升爲之序

歐陽時字文柱號敏齋郡試冠軍補弟子員食餼四十人申道光壬午舉於鄉連丁內外艱未赴禮部試主講承綬廳綬陽書院邊徼文風爲之一變乙未成進士籤發湖北卽用知縣充是年鄉試同考官旋署竹山縣知縣革除陋規嚴束胥吏每單騎詣鄉村驗勘案外不侷累一人時兼攝竹溪縣篆甫三月讞結九百餘案不

新化縣志

卷第二十一

人物 宦蹟

三

事鈞距竹山有曾丹桂者巨痞也捕之至訓知尙畏法宥使自新桂歸告其黨曰歐青天在上我輩宜改行爲良民自是一縣帖然竹山本瘠壤知府某貪而墨者也誅求不遂輒借端中傷一日縱蠹役數輩來竹山署百端重索時弗應竟攜其鑼以去時怒坐堂皇追之反予以杖且令歸告知府曰歐某作朝廷官不能腴民脂膏以取媚也卽告病回籍改就教職授永州府教授居官五載諄諄訓課士子多就學署肄業年六十七卒於任時狷介性成清廉自矢績學敦品出處一轍子達保敘巡檢孫震縣學生

魏崧字維嶽一字祝亭父起茂見孝友崧幼慧甫四齡塾師授以王伯厚童蒙課至六畜句起問曰家固有鶩與鴨曷以遺諸崧太父在館異之徐語之曰是据外紀庖犧氏養六畜以供庖廚享神祇故止及此崧卽默識不忘長益研究經史癖春秋三傳由廩生

中道光壬午科鄉試明年成進士文皆得力於左新安相國曹文正評爲根源浩大屬有用才以知縣簽發四川歷權大竹樂山隆昌隆昌猾衿某重索寡嫂已償券崧廉得實將置之法猾懼自經其子誣訴大吏或勸唱之金事可解崧謝曰今而賄人也曷若昔賄於人吾去其害民者他何恤焉罷官縣民泣送略無慍色居閒著作自娛會越雋不靖襄事戎幕動合機宐敘功復原職署興文鄰水南充皆有聲甲辰授南川知縣南川俗刁悍稱難治滯案鱗積崧至剖決如流逾月盡結縣遠鄙萬盛場與黔接壤土豪韋正達踞其地動撓官柄設案聽訟顛倒曲直始言一二事崧亦笑頷之一日突條其罪置之獄詳於上官發配烏龍江軍民歡聲如雷成都有少婦與幼弟歸甯中途婦忽失所在兩造延訟未有已鄰縣綦江市有富人攜數千金挈眷賃屋而居一夕皆斃其地訴之

新化縣志

卷第二十一

人物 宦蹟

七

官莫得殺者主名重慶知府委崧越縣代審崧見其僕疑之厲聲曰殺人者汝也僕色變不數言吐實其金尙存僕之戚某家時成都跡婦者聞其事來詰卽所失婦其富人則引婦潛逃者也兩案並結人爭稱其神明己酉歲大饑請發賑米二千石不給勸富民捐三千石又不給崧自捐廉購米繼之活人無算是歲正科與前己亥 恩科充四川鄉試同考試官南川舊志規模猶具崧增修

徵文考獻燦然美備在任十載嚴鄉學規條有鄉學規條十則籌歲科卷

費有新設義義卷記造橋梁以利行旅有永鎮橋碑記施義冢以掩枯骼道光二十七年捐俸

倡買義冢地一一在文家坪碑豎道旁一在城北生基坪凡有裨士民者百廢具舉事詳南川

縣志道光三十年南川紳耆建德政坊於治西十里紀德政十六

條又豐五甲叢香橋豎德政碑篆樂只君子四字於額誠曠舉也

秩滿引 見卒巴縣旅次年七十崧姿幹倜儻聲如洪鐘篤內行

少孤事寡母孝就外傳日暮 歸省必躬滌櫛翁伯仲居賈折閱驚
已產償之待羣從子姪教養 开至有沾潤而仍缺望者置弗校著
壹是紀始二十二卷補遺一卷 天涯聞見錄四卷四聲綜辨照紹
衣堂四聲便覽遵字典按畫分 部均梓行世子十一人以次子鼎
薰同知銜 晉贈中憲大夫

王家勳字國光號麓屏幼失怙 含辛茹苦與孀母偕十一齡尙未
就傅叔父室萬見其聰穎與從 子者瑞謀所以成之甫執筆爲文
卽迥軼儕輩者瑞喜謂其叔父 曰此子成立可剋期待也年十九
隸學籍旋食廩餼道光戊子領 鄉薦癸巳挑取騰錄中乙未科進
士官銓曹文選司主事兼驗封 司事居官十三載趨公無虛日事
必準情理而出不以谿刻爲能 何文安凌漢及諸閣學甚重之家
勳性慷慨有求輒應尤喜振厲 人材每春秋兩闈邦人士赴都者

新化縣志

卷第二十一

人物 宦蹟

三

砥厲規勸之餘課以詩文日久 無懈志尋以母老解組歸左右就
養依依如孺子時友愛諸昆季 不忍析箸待族戚甚厚鄉鄰或構
釁力爲解燬疾惡顧甚嚴巨痞 劉成蛟者聚黨劫掠爲一邑患家
勳以計捕之送於官寘之法井 里肅然年五十六卒子政懋見官
安福訓導政慈授廣西東蘭州 知州見署宣化知縣

晏貽玖字子佩號廉泉內行肫 篤父歿哀毀逾禮奉母克盡孝養
兄弟素不羈行多敗檢貽玖規 之不聽則繼以泣兄弟卒皆悔悟
性嗜學爲邑名宿曾承謙入室 弟子中道光戊子鄉試以知縣挑
發浙江時夷匪滋擾瀕海多被 蹂躪諸州縣悉索供億民不勝苦
大吏知其能檄權樂清松陽平 陽麗水等縣知縣至有一月攝三
篆者貽玖念瘡痍未起撫循備 至民困始蘇樂清尤近海貽玖初
至見城垣傾塌以謂寇勢方張 不可無備亟請於大府支帑爲繕

葺計並首捐廉爲之倡支費不繼至賠累鉅萬不以病民故事集而民不擾癸卯科充浙江鄉試同考官得來煦等八人皆一時知名士補遂昌知縣政聲益著捐陞四川直隸州知州未赴而卒輯有樂清縣修城奏藁見藝文志

劉應祥字雲皋弱冠補弟子員卽以經執授徒里中多所造就道光辛卯舉於鄉甲辰成進士分發陝西歷署城固靖邊石泉三原知縣咸豐壬子補安康知縣居官不名一錢所至以愛民爲主士民爭立生祠製萬民衣繖爲之壽其初莅安康也卽值楚南徵兵供屏峙糧咄嗟立辦兵甫出漢水大溢決城與署溺人無算應祥被洪波衝至龍窩叢木上舟子拚而出創數十處人皆謂神助應祥不色喜惟以振饑援溺爲己任時大府委觀察令佐數員駐城辦賑計供張者兩月餘事甫訖粵氛又熾徵兵漢中防堵白河平

新化縣志

卷第二十一

人物 宦蹟

三

利方伯連帥往來如織糜金逾四千有奇城隍衙署一時興復財取諸議敘役取諸管徒士民見其指摺萬狀謹然伏助輸金粟捐瓦材剋期告成無或後者安康舊有興賢學倉前令百計壞之應祥廉得實次第復初每月應課生童森森林立鄉賢劉大和塋兆返其侵地段節婦廢坊復其紳楔尤惓惓以表彰往詰闡發幽光爲急務擢甯羌州知州甯羌回民某橫甚李布商因眾怒殲其家應祥以是事聖吏議罷職陝西夙服其教至是造門請業者百餘人多騰踴以去會丁母艱以毀卒於旅館甯羌舊有劉公祠祀相國劉文正之父蓋曾爲州牧者州人進祔應祥主稱二劉公祠門下士巴陵謝維藩大史表其阡子四經筵候選巡檢經籍國子監生以防勦功保敘府照磨

蔡錫申字彰德號獄屏祖世燦字列星績學能文屢魁童試奇於

數益自刻厲患咯血早世父澤瀛號神洲喜博覽亦困童試業醫活人不索謝生四子錫申其三也領道光乙未恩科鄉薦屢試禮部不售甲辰大挑一等以知縣發直隸庚戌署大城縣篆值辦

大差道段及恭迎

神牌黃輿回京差務均稱事

賞加

二級咸豐改元調署香河剔積案謀士林除奸弭盜都人士翕然忭頌甲寅借補定州直隸州州同爲州牧王某所倚重乙卯題補東明縣知縣先是東明有聯莊會抗糧不納前令顯頊寢久勾結成匪錫申未之任時大府諄諄以此事相屬至卽委幹役不次傳喚弗應乃親履其地多方勸諭眾帖服繳軍器斂戢奉法卒爲良民縣瀕黃河突銅版閘決口漂沒十餘州縣東明全境被淹錫申爲文禱於神水漸平乃護城護關籌船籌筏赴鄉勘災日徒行數十里或掉舟冒險烈風暴雨驟至瀕危者再四時饑民填塞請於

新化縣志

卷第二十一

人物 宦蹟

三

大府發賑以濟歡聲載途入冬水退卽集眾繕城垣築堤堰疏河流塞漫口而是年伏汎更大爲災更劇按察使吳某親臨稽查以東明辦理甚善飭附近長垣縣賑亦歸錫申給放敘勞加同知升銜丙辰以疏防盜案離任士民懇留丁巳直隸總督譚廷襄奏準開復原官戊午代理獲鹿調署懷安庚申夷船駛至天津直隸總督恆祺駐防海口調襄防務辛酉檄署內邱縣事內邱當孔道差務繁重又連歲旱蝗捻匪不時竊發錫申力督鄉團籌辦防勦賊不能入同治元年代理元氏直隸總督文煜敘辦內邱防勦功賞加鹽運同銜旋調大順廣兵備道王榕吉營襄佐軍務子玉麟以河工縣丞發直隸隨錫申往榕吉遷按察使秦聚奎按篆倚任一如榕吉已因公晉省而聚奎勦賊遇伏殉難玉麟亦死錫申聞報慨然曰吾身受國恩愧無涓埃報效兒若此得死所矣癸

亥三月代理開州兼攝長垣往來無虛日六月接署開州時山東
擒匪宋景詩等敗竄州界錫申督勇擊之賊遁九月調署清豐清
豐團長孫懷珍馬學孟構怨日尋干戈已逾一載錫申諭以大義
散其器械兩團始安三年以病劇乞歸卒於河南葉縣時年五十
有八玉麟 贈鑾儀衛經歷 予世襲別見忠義

唐鈞字季同父琳廣東豐順知縣卒於官虧款纍纍大府召問其
繇鈞早籍出入二冊上之知爲因公暗累隨飭潮州九屬攤償羈
縻三載始得歸款既攜健僕兩次航海獲贖千金乃昇父櫬歸里
道光三十年新甯李沅發謀逆湖廣總督裕泰銜 命巡邊鈞赴
行臺省襄理軍務以國子監生議敘從九用旋丁內艱咸豐三年
授江忠烈忠源營守江西省城著績進府經縣丞七年石逆達開
再犯楚境鈞防勦郴桂永州等處擢知縣八年授江西贛州府經

新化縣志

卷第二十一

人物 宦蹟

美

歷履任未久檄代定南廳撫民同知石逆所部賴剝皮由桂陽擾
定南攻安遠鈞率勇防禦隨同各營解安遠圍敘功予優缺贛州
接連閩粵險遠多盜鈞屢辦軍差無遺誤大吏廉其才檄權興國
縣事徵解稱最每坐堂皇引決數十案雪冤理誣有廉幹聲會補
歲科兩試捐廉備卷費得黃英采陳作霖二人拔冠軍采中丁卯
科第三名舉人作霖與采同榜連捷進士僉稱得人前令有母喪
未舉者鈞厚賻之金得歸葬卸篆後轉餉安慶兩江總督曾國藩
奏畱以知縣歸皖補用飭辦穀米總局尋以勞卒鈞性孝嘗割
臂愈母病讀書不斷斷科第畱意爰書旁及篆隸金石之學久之
俱臻工妙與同縣魏鼎薰善鈞卒後鼎薰搜其手寫六書正譌言
於寶慶知府邵綬名爲之序刊

新化縣志卷第二十一終